



KEMENTERIAN PERPADUAN NEGARA

TEKS UCAPAN

**YB DATUK AARON AGO DAGANG
MENTERI PERPADUAN NEGARA**

SEMPENA

**PROGRAM CILIK PERPADUAN KEMBALI KE TABIKA PERPADUAN
DAN TASKA PERPADUAN TAHUN 2025**

28 FEBRUARI 2025 (JUMAAT)

3.00 PETANG

**TASKA PERPADUAN TAMAN SRI RAMPAI,
SETAPAK, WILAYAH PERSEKUTUAN KUALA LUMPUR**

Salam Perpaduan dan Salam Malaysia Madani

SALUTASI

** disediakan secara berasingan*

PENDAHULUAN

1. Petang ini, kita semua berkumpul bagi meraikan **Program Cilik Perpaduan Kembali ke Tabika Perpaduan dan Taska Perpaduan Tahun 2025** yang dianjurkan oleh Jabatan Perpaduan Negara dan Integrasi Nasional.
2. Pada masa kini terdapat sebanyak **1,781 Tabika Perpaduan** dan **41 buah Taska Perpaduan** dengan jumlah murid yang berdaftar pada hari pertama **sesi persekolahan Tahun 2025/2026 adalah masing-masing seramai 34,654 orang murid Tabika dan 990 orang murid.**
3. Pepatah Melayu ada menyebut, “**melentur buluh biarlah dari rebungunya**”. Sehubungan itu, jika kita mahu melahirkan generasi yang bersatu hati, semangat patriotisme, cintakan tanah air dan mempunyai semangat jati diri yang tinggi maka pendidikan awal kanak-kanak hendaklah menjadi keutamaan negara.
4. Pendidikan awal yang disediakan di Tabika Perpaduan dan Taska Perpaduan bukan hanya mengenai akademik, tetapi menekankan keutamaan dengan menerapkan **nilai-nilai murni seperti hormat-menghormati, kasih sayang, toleransi dan semangat kerjasama** dalam kalangan kanak-kanak.

5. Program Pengajaran dan Pembelajaran (PdP) di Tabika Perpaduan adalah memfokuskan kepada elemen penghayatan Pendidikan Rukun Negara dan nilai-nilai murni di samping Kurikulum Standard Prasekolah Kebangsaan (KSPK). Modul-modul khusus yang berteraskan perpaduan dan kenegaraan telah dibangunkan untuk diterapkan kepada murid seawal usia. **3 Modul khusus yang dibangunkan dan diajar di Tabika Perpaduan** adalah seperti berikut:-
 - i) **Modul Pendidikan Rukun Negara**
 - ii) **Modul Jom Urus Diri**
 - iii) **Modul Pengajaran Komunikasi Asas Pelbagai Bahasa (Mandarin, Tamil, Iban dan Kadazan)**
6. Penerapan nilai murni dan nilai perpaduan boleh dikembangkan dan diperkukuhkan melalui transformasi pendigitalan melalui penggunaan teknologi komunikasi dan maklumat serta AI. Pendidikan Digital merupakan kunci yang perlu dikuasai oleh para pendidik untuk membuka pintu kepada pendidikan yang berkualiti untuk anak-anak selaras dengan aspirasi Dasar Pendidikan Digital.
7. Kementerian juga bercadang agar pendidikan dan modul Rukun Negara ini turut dikembangkan kepada prasekolah KPM, tadika KEMAS dan tadika swasta dalam usaha menerapkan elemen kenegaraan dalam kalangan kanak-kanak.

KEMUDAHAN DI TABIKA PERPADUAN DAN TASKA PERPADUAN

Hadirin yang saya kasihi,

8. Saya suka memaklumkan bahawa unik dan istimewanya Tabika dan Taska Perpaduan kerana banyaknya kemudahan yang telah disediakan oleh pihak Kementerian kepada kanak-kanak yang menyertainya. Semua perkara ini disediakan bagi memastikan semua murid dapat kembali ke alam persekolahan dengan kemudahan terbaik, bersedia, selamat dan bersemangat untuk belajar.
9. Dalam Belanjawan MADANI 2025, Kementerian telah diperuntukan sebanyak **RM5 juta bagi penambahbaikkkan tabika perpaduan**. Antara skop kerja penyelenggaraan dan pembaikan premis Tabika dan Taska Perpaduan adalah seperti berikut:
 - I. menaik taraf, menyelenggara dan membaikpulih premis taska dan tabika perpaduan meliputi kerja mekanikal, elektrik dan sivil serta kerja pembaikan cerun; dan
 - II. perolehan peralatan, perabot dan kelengkapan mengikut piawai.
10. Pada tahun ini juga, Kementerian Perpaduan Negara telah memperuntukkan sebanyak **RM33.73 Juta** bagi penyediaan pelbagai kemudahan seperti berikut:
 - i) **Starter Kit Tabika Perpaduan** yang terdiri daripada baju seragam dan beg sekolah;

- ii) **Starter Kit Taska Perpaduan** yang terdiri daripada baju seragam, beg sekolah dan selimut;
 - iii) **Buku Aktiviti Murid Tabika Perpaduan dan Buku Log Harian Taska Perpaduan**;
 - iv) **Perlindungan Insurans Kemalangan Diri Berkelompok** bagi Murid Tabika Perpaduan dan Kanak-Kanak Taska Perpaduan;
 - v) **Geran Perkapita Murid Tabika Perpaduan** bagi pengurusan dan pentadbiran di kelas Tabika Perpaduan dengan kadar RM100 setiap murid; dan
 - vi) **Bantuan Makanan Tambahan (BMT)** juga diberikan bagi memastikan semua murid mendapat makanan yang seimbang dan berkhasiat. (RM3.00 bagi Semenanjung Malaysia dan RM3.25 di Sabah, Sarawak dan WP Labuan untuk setiap murid mengikut hari persekolahan. Manakala kadar Taska Perpaduan adalah sebanyak RM8.00 sehari.)
11. Selain itu, Jabatan Perpaduan Negara dan Integrasi Nasional telah **membekalkan Perkhidmatan Internet CelcomDigi di Tabika Perpaduan dan Taska Perpaduan dengan peruntukan sebanyak RM763,200.00**. Penambahbaikan kemudahan akses internet di Tabika Perpaduan dan Taska Perpaduan ini diharapkan dapat membantu hasrat Jabatan untuk melahirkan murid-murid yang berpengetahuan, berketrampilan dan kreatif serta inovatif seiring dengan perkembangan pendidikan digital.

12. Kita sangat bertuah kerana **PTPTN telah bersetuju menyediakan Akaun Simpanan SSPN Prime sebanyak RM120,000.00** untuk manfaat murid di samping memupuk budaya menyimpan wang bermula di peringkat awal persekolahan. Usaha ini adalah demi kelestarian pendidikan anak-anak Tabika Perpaduan pada masa hadapan.

PENUTUP

Hadirin yang saya kasihi sekalian,

13. **Terima kasih kepada semua ibu bapa dan penjaga yang telah memilih Tabika Perpaduan dan Taska Perpaduan sebagai institusi pendidikan awal kanak-kanak.** Saya mengambil kesempatan ini menyeru semua rakyat Malaysia untuk memilih dan menghantar anak-anak ke tabika perpaduan. Percayalah, tabika perpaduan adalah platform integrasi nasional yang terbaik yang harus diberikan sokongan oleh semua pihak.
14. Dengan itu, saya dengan rasa sukacitanya **merasmikan Program Cilik Perpaduan Kembali Ke Tabika Perpaduan dan Taska Perpaduan Tahun 2025.**

Sekian, terima kasih.